

«Adina avert per il nov»

Ettore Tenchio è mort

DA GION NUTEGN STGIER / ANR

■ **En sia chasa a Cuira è mort ier Ettore Tenchio, l'antierur cusseglier guvernativ e cusseglier naziunal dal Grischun. Cun sia mort perda noss chantun in um cun in grond format politic, ina persunalitad ed in uman ch'è adina stà fidaivel a ses princips.** Ils 21 d'october da quest onn avess Ettore Tenchio cumplenì ses anniversari da 100 onns. Cun el murir ier, causa da deblezza da vigliadetgna, ha el betg gi l'onur da pudair festivar quel anniversari radund. Naschì era Ettore Giovanni Michele Tenchio a Roveredo. Suenter las scolas fundamentalas ha el fatg al Collegio Papio ad Ascona la matura e lura studiegia a Milaun, Friburg e Berna giurispudenza e doctorà il 1938. Diesch onns è il giuven advocat stà activ a Roveredo e dapi il 1960 ha Ettore Tenchio lura gi a Cuira ina chanzlia d'advocat.

Stà candidat per il cussegl federal

Ettore Tenchio è lura er stà in grond um da la politica. Dal 1943 fin il 1950 è el stà deputà e suenter nov onns cusseglier guvernativ da noss chantun. Dal 1947 fin il 1971 è el stà cusseglier naziunal per ils cristiandemocrats ed il 1962 schizunt candidat uffizial per il cussegl federal. Elegì ha dentant il parlament federal da lez temp betg il candidat dal Grischun, mabain Roger Bovin, il candidat dal chantun Vallais. Dasper sias numerusas activitads ha Ettore Tenchio er presidià l'Uniuin da traffic

dal Grischun davent dal 1960 fin il 1976. Dal 1971 fin il 1980 è el er stà president da la SRG SSR e parsura da la Banca della Svizzera Italiana. En l'armada svizra è Ettore Tenchio stà colonel. Ultra da quai è il cristiandemocrat er stà 15 onns (1969–1984) president dal Corpus Catholicum.

Persequità cun interess il svilup

Stefan Engler, l'antierur cusseglier guvernativ, l'actual cusseglier dals chantuns e president da la pcd grischuna è commuventà da la mort d'Ettore Tenchio. Fin avant in onn saja el adina stà preschent a las radunanzas da delegads da la pcd e s'interessà fitg per ils affars politics. El haja adina er gi interess per las activitads da la partida naziunala da la pcd e quai er en sia auta vegliadetgna, punctuescha Stefan Engler. Il svilup politic, economic e turistic dal Grischun, quai haja el er adina observà cun grond plaschair e quai er cun esser gia pli sin ils onns. Ettore Tenchio saja adina stà ina persuna averta, in um iniziativa e cunzunt er in uman cun in visament sco paucs auters. «Jau hai mai senti be ina suleta giada ch'el avess ditg che pli baud, da ses temp activ sco um da la politica, eria tut meglier», ha ditg Stefan Engler. El saja lura er stà ina persuna che saja adina stada fidaivla a ses princips, uschia avevan las valurs da famiglia e dals cristians per el savens dapli impurtanza che la politica. Cun la mort d'Ettore Tenchio manca al Grischun ina gronda persunalitad, accentuescha Stefan Engler.



Ettore Tenchio è mort en la vigliadetgna da bunamain 100 onns.

FOTO N. SIMMEN